

右厭邪人盡變成道以救死命訣

太平經卷之七十二

太平經卷之八十六原佚八十七

來善集三道家書訣一百二十七

傳八

六方真人俱謹再拜前得天師教人集共上書嚴勅歸各分處結習心思其意七日七夜六真人三集議俱有不解三集露議者三睹天流星變光一者見流星出天門入地戶再者見流星出太陽入太陰三者見列宿流入天獄中因三并而共策之恐天師三通行書為下所斷絕使不得上通復令天怒重忿怒上皇氣不得來也令帝王道德之君固固承負先王餘災不絕而得愁苦焉咄咄六真人為皇靈共來問事益精進天焉哉吾見諸弟子言無可復以加諸真人也今試自說其流星意六弟子愚蔽敢不言初始一流星出天門入地戶天門者陽也君也地戶者陰也民臣也今民臣其行不流而上附返上施恩於下夫門戶乃主通事今下戶不上行返上門通門而下知為下辭會見斷絕不得上行也善哉真人言吾無以加之也行雖苦復說二事唯唯二事見太陽星乃流入太陰中太陽

君也太陰民臣也太陽明也太陰闇昧也今闇昧當上流入太明中此若民臣暗昧無知困窮當上自附歸明王聖主求見理冤結今反太明下入闇昧中是象詔書施恩下行者見斷絕闇昧而不明下治內獨亂而闇蔽其上也又象比近下民所屬長吏共蔽匿天地災變使不得上通冥冥與民臣共欺其上共為姦之證也善哉善哉吾無以加六子言也行雖苦復說其三事唯唯三事見列宿星流入天獄中夫列宿者善正星也乃流入天之獄獄者天之治罪名處也恐列士善人欲為帝王盡力上書以通天地之談返為閒野遠京師之長吏所共疾惡後返以他事害之故列宿乃流入獄中也善哉精哉吾無以加六子言今六子問事乃何一怒也獨不懈倦耶不敢也常見天師言真人為天來問事今欲止恐天辭不通今凡人命屬天地天地不喜返且害病人則不得竟吾天年壽矣善哉真人之言是也不失之也今吾為諸真人說亦不敢遺懈止也吾與諸真人等耳俱命屬

天地若閉不說說而中止也天地同且害我故我說亦不敢妄道止也行且為六真人具說之今六真人新出穴為天思可以除天病者為有德君思可以除解災安身者六真人極共說其意蓋心所欲言者令使不得閉絕唯唯天師所勅不敢不盡雀鼠之智悉言之不也大憚唯唯今天下所畏口閉為其不敢妄誕今日月星應親天之列宿神也尚相畏是故日出星軌逃匿不敢見畏其威夫四境之內有嚴帝王天下驚駭雖去京師大遠者里語書不敢語也一州界有疆長吏一州不敢語也一郡有疆長吏一郡不敢語也一縣有剛強長吏一縣不敢語也一閭亭有剛強亭長尚乃一亭部為不敢語此亭長尚但吏之最下者也何況其臣者哉皆恐見害焉各取其解免而已雖有善心意不敢自達於上也使道斷絕於此今但一里有剛強之人常持一里之正者一里尚為其不敢語後恐恨之得害焉但一家有剛強武氣之人常持政尚一家為其不敢語也一家尚親自共血脉

同種類而生高乃相厭畏如此何況異世乎今太上中古以來多失道德反多以威武相治威相迫協有不聽者後會大得其害為傷甚深流于孫故人民雖見天災怪俗駭畏其比近所屬而不敢妄言為是獨積久更相承負到上古尤益劇小有欲上書言事自達於帝王者比近持其命者輒殺之不即時害傷後會更相屬託而傷害之故民臣悉結舌杜口為暗雖見愁冤暗惡不敢上通故今帝王聰明絕也而天變日多是明證效也今民親得生受命於天地以天地為父母見其有災變善惡是天地之談語欲有此言也人尚皆駭畏且尤害於比近所繫屬者不敢語言泄事迺相勸教共背天地與共斷絕不通皇天后土所欲言也共蔽冤天地乃使其辭語不通天地長懷恨悒而不達今帝王雖神聖一人之源乃處百重人之內萬里之外百重之內雖欲往通言迫脇於比近不得往達也夫帝王雖有萬萬人之仁聖人各迫劫畏事天地極最神聖人乃仰視俯瞻尚倚之當前自

解而已帝王安能神聖於天與地乎愚生六人常逢猛虎於遠方間野六人俱止足不敢移口不敢語頭不敢動目不敢瞑夫人之所迫脇所畏如此矣善哉善哉今見六真人言承知天獨久病苦冤辭語不得通雖為帝王作萬萬怪變以為談下會閉絕不得上達獨悒悒積久今故風諸真人教其丁寧勅此行書之事故諸真人悚悚倦倦是天使也諾諾吾其畏天威方為子思惟其要意而具說今之六真人問此事常何一最劇也愚生六人七日七夜共念此行書事三集議三睹流星以為天告人教勅使人問也又六人俱食氣俱咽不下通氣逆而更上當此之時耳目為之眩暝無睹俱怪而相從議之不知其為何等大駭驚怖唯天師為愚生說之善哉諸真人古變得具意見諸真人言乃知三道書真人會且復見閉絕何乎願聞其意決然夫九竅乃象九州之分也今諸真人自言俱食氣通暢不通眩暝無光明是九州大小相迫脇下不得上通其言急事也夫氣者所以通天

地萬物之命也天地者乃以氣風化萬物之命也而氣不通過者是天道閉不得通達之明效也天欲使真人丁寧此事故以此氣動感真人也子知之耶唯唯行子已知之矣諾天告六真人教吾極言耶六子安坐為諸弟子悉說之道之為畏其州郡長吏不敢言者一州中諸善士賢明相索共集議於他州上之畏其郡集議於他郡上之畏其縣集議於他縣上之畏其鄉亭集議於他鄉亭上之畏其里集議於他里上之皆悉在方其禁畏人者以其所上罪變怪輕重罪之復加故罪一。等何其重也不應重也高怒其輕今天地愛有德帝王欲為其具談人生於天地乃背天地斷絕天談使天有病乃畜積不除懼悞不得通言報其子是一大逆重罪也夫民臣乃是帝王之使也手足也當主為君王達聰明使上得安而無憂共稱天心天喜說則使君延年今返居下不忠背及天地閉絕帝王聰明使其愁苦常自責治失正災變紛紛危而不安皆應不孝不忠不信大逆法不當得與

於赦今何重之有乎天談不得通天地大怒賊殺凡物乃為毀天地乃為太凶之歲國斷無聰明乃為大危之國此罪不可復名故為當死過也真人知之耶唯唯行子已知之矣吾所以敢不口口者見六子來問事致承知為天使諸真人故敢不口口也子知之耶唯唯今不口口之名為誤上也德君見文皆令物上書者使其大口口有功者德賜之也如此則天下莫不歡喜樂盡其力共上書言事也勿得獨有孤一人言也皆令集議一人言或妄偽佞欺名為使上失實不可聽大過也。比連年上書比比有信有大功者上士之人眾集者常病不多而三人集固固有有奸偽多者無奸偽何也願聞之然多者則其上書者便自傳相畏恐事漏泄見得長短反為欺上為僂人所上故盡實核口口乃敢言之也不口口不敢言又不敢有可隱皆畏恐有後事是故悉信也比如一里百戶共欺也男女小兒巨人會有泄之者旁里會有知之者其里賢明畏事者會不敢匿恐坐其事何況乃

一州一郡一縣一鄉一亭郡有非常事陽陽何可隱猶為旁人所得長短故善惡都畢出天乃大喜災除去與流水無異也子知之耶唯唯又大集議無敢欺者一兩人欲欺餘人會不從之也有欲欺不信者即時眾共記之上之其法應為替天地欺帝王詐偽大逆不道之人也天怒之人惡之其罪不得與赦也真人知之耶唯唯行子已覺矣已行上書還反其家有怨其行上書欲害者即左方之名為怨章罪過不除如是則三道行書已通無敢閉絕者也如是則天地已悅矣帝王承負之災厄已大除去天下太平矣上皇氣悉來到助德君治矣口口不負六真人也唯唯行六真人精已大進為天除病矣為帝王除厄會矣功已著於天矣王者已日彊明矣六真人為善已得其數矣宜勉力慎之慎之唯唯願問一大訣惟天師示之欲知行書乃出入究洽於神靈未豈可闕乎然自有大驗天道不欺人也各以其類相求索令德君數遣信吏問民間有疽癘疥者無有者多少有疽癘

齊者行書未究洽於神靈自苦有餘蟲食人
蟲乃食人即蟲治人也固固下有餘無道德
臣民比若蟲矣反食於是使蟲治人之效
也無有疽癘齊者即皆應善人在位無復蟲
也此者萬不失一善哉善哉獨以此明之耶
復有餘耶凡天下災異皆隨治而起各有可
為但精思其事且自知之也何獨以疽癘疥
言之乎其餘災尚但見於萬物蟲反食人最
劇故以效之也善哉善哉獨不力問於天師
無從得知之也觀諸真人今且說已自知之
矣但引謙耳不敢不取愚生六人重得天師
嚴教各歸居便間處惟思其要意今天師書
文悉使小大下及奴婢皆集議共上書道災
異善惡曾不太繁耶哉異生願聞其意善哉
子六人為天問事詳慎乎天使諸真人言也
然所以使下及庶人如婢者今天之法界萬
里異天地五千里復小異千里異風氣五百
里復小異百里異陰雨五十里復小異一縣
異變災怪善惡也夫皇天有災怪變非必常
當處帝王之宅縣官之庭長吏之前也災變

異之見常於曠野民間庶賤反先知之也各
為其部吏諱不敢言吏復各為其君諱而不
敢言反共斷絕天地談人人欲舉其長吏使
其名善而高功疾遷共作無道互天地之災
異變怪今閉塞不得通達帝王之前使帝王
無故斷絕無聰明不得天地心意其治危亂
難安得愁苦焉夫帝王天所父命生以天為
以地為母帝王為天子民臣共為無道乃斷
人父母談語不得通於其子其罪莫大焉為
共斷絕天地之談共欺其上為人民臣不忠
信遇乃如斯罪當輕重寧可名字耶子覺未
唯唯又凡民臣奴婢皆得生於天長於地得
見養理於帝王以此三事為命無此三事則
無緣得生長自養理也而反下皆共欺其上
共無知天與地使帝王無聰明閉塞罪皆應
萬死尚復有餘罪何其重也真人其愚闇不
解何哉人得生於天長於地天地愁苦有病
故作怪變以報其子欲樂見理愚民反共斷
絕天辭天地大怒之帝王民臣之父母也民
臣反共欺其父母使其常用心意愁困而不

能平其治咎莫大焉天地開闢已來承負之
厄會大積悉起於是故使民間上書也今陽
明德君治天難愁苦之故使吾言也善哉善
哉行今為真人道之今天下日蝕極天下之
大怪也尚或有睹或有不睹天下之災異怪
變萬類皆天地陰陽之變筆談語也或國不
睹而州睹或州不睹而郡睹或郡不睹而縣
睹或縣不睹而鄉亭睹或鄉亭不睹而民間
人睹或甲里不睹而乙里睹故古者賢聖之
治下及庶賤者樂得異聞以稱天心地意以
安其身也故其治獨常安平與天合同也今
太平盛氣至有一事不得輒有不和即天正
氣為不至比若愚民竭水而漁蛟龍為不見
此之謂也今故悉使民間言事乃不失天心
絲髮之間乃治可安也民間自力集上書部
諸長吏亦且恐後民言事且力遣吏問民間
所睹疾復上之則變災無有失也如是皇天
后土為其大喜愛其帝王以何明之乎然有
證乃日月為其大明列星守度不亂錯行是
天喜之證也地喜則百川順流不妄動出萬

物見養長好善也即是地之悅喜之證也真人知之耶唯唯天師幸哀愚生得其事者進問緣見待厚乃得悉問所疑今使民間記災變怪云何哉然善乎子問事也然當見之時支日晏蚤戶記之月盡者共集議之可上而上之未足上者復待後月災異如此縣邑長吏且取晏蚤之時於民間也則可謂為不失天之災絲髮之間也吏亦畏民民亦畏吏兩相畏恐所上皆得實不失銖分之間則令帝王安坐幽室無憂矣民臣百姓大小盡忠信得達其情實矣天下莫不歡喜如有止者即共記之皆應奸臣不忠孝之民無知天地共欺其上使上聰明斷絕是大過也故當共急記之真人知之耶唯唯行去有疑來問之今六真人俱歸慕思惟天師使長吏民間共記災異變怪皆當共記何等者哉善乎六子問事詳善不失天心不負德君是為有功於天地萬物莫不被蒙之也所以然者乃其為天問事口口悉究竟詳善故不失銖分天地陰陽三光五行四時神祇萬物所欲言悉得見

故為大有功也子知之耶唯唯行今為六真人陳之詳自隨而記之唯唯然夫大災異變怪者是天地之大談也中災異變怪者是天地之中談也小災異變怪者是天地之小談也子欲樂知其大意要比若人大事大談中事談小事小談此大小皆有可言也不空見也天地不妄欺人也見大善瑞應是其大悅喜也見中善瑞應是其中悅喜也見小善瑞應是其小悅喜也見大惡凶不祥是天地之大怒也見中惡凶不祥是天地之中怒也見小惡凶不祥是天地之小怒也平平無善變亦無惡變是其平平亦不喜亦不怒子知之耶唯唯災異變怪大小記之勿失銖分也何其悉詳乎真人何其愚也過大小盡當見知善惡大小亦悉當見知也善者當謝其功以善踰異之過者數讓之以稱天地之心意子欲知其效者天比若人君長也一小言不見從則小恨更中言不見從則更大恨更大言則為害矣故當大小記之不當使天地恨怒也善哉善哉願聞所記意記變怪災

異疾病大小多少風雨非常人民萬物所病苦大小皆集議而記之所以使其共記之者吏自相知長短民民自相知長短迨近山阜而居者知山阜變近市城郭而居者知市城郭變近平土而居者知平土變近水下田而居者知水下田變高下外內悉得知之故無失也是立致太平之術也而帝王所宜用不失大心之法也真人知之耶唯唯行子已知之矣天地開闢以來所以多承負之災者由其記事不及民間大小共集記之故也有變怪反乃他所長吏來行之比近各為其部界長吏諱不言共匿之因使天地辭語斷絕不得上通達其帝王為害甚深令天悒悒災為之復增益各在此也他所長吏來考事安知民間素所苦者乎或相與厚善反復相與共隱匿之或得素有所不比之家反復增加災妄增益其事故之也共匿之則使天地談斷絕加故共兇無罪之人復今下比貨財相隨此三事皆為大害冤結氣復更增其災害也故其治殊不可平也今夫太陽與平氣盛出

德君當治天下太平莫不各得其所者是故六真人來為其具問事吾為其悉語也子知之耶唯唯是故天將興祐帝王皆令自有意從古到今將興祐之輒為奇文異策今可案以治故所為者悉大吉也將不祐利之悉斷之奇文異策使不得之也如得之又使其心愚不知策而用之也將興利之使其心曠然開通而好嬉用之也此者天之格法也不欺人也故凡人將興者多好善將衰者多好惡也將吉者易開導也將凶者好抵冒人也不可開導也真人知之耶唯唯是故天者常祐善人道者思歸有德故天者不肯祐惡人道者不肯附於愚蔽人也故常勅真人以付歸有德之君也所以悉記其災異變惟大小善惡外內遠近者欲令上有德之君與眾賢原其災異所起夫天下變怪災異皆象其事法其行緣類而生眾賢共集議思之曠然如其意以其事類考問之則得之矣則天地日為其大喜帝王日為其大安如此則德究洽於神祇莫不饗應欲知其大効天下所疾苦災

異悉盡民臣悉善應詔書而行不失銖分下不欺其上之明效也有餘多害自若多欺者少害少欺者無一餘害無一欺者常安觀下所上以占民臣大小忠信與不以其事對之比若窺明鏡相對而面語神哉為道如斯此乃天祐上德之君子其治天下之明鏡也真人知之耶唯唯行去付上德之君急急一人獨上書名為投書治事付一信名為大欺與皇天為重怨天道為其常亂也二人共上書名為太陰合新共欺二猾人固固相勸戒或共有一可怨惡共上之共為虛偽也與地為咎地道為其大亂也三人共上書固固尚不實三人固固可相勸教共有所疾共上事以公報私固固為共欺其上也與中和為仇令和氣大亂也四人共上書中輒有畏事不真者為傍人所得長短為罪名固固將似類真也其不信者亂四時也五人共上書似真未信口口也其不信者輒亂五行也六人共上書將真未信也其不信者輒亂六合也七人共上書似信八人近真九人近實十人而小

口口今天師何其疑之多也願聞其要意然所以疑之多者或五方好猾人俱自有私怨欲以公報私固固可共相與為大欺猾人亂天地道而誤上故未疾純敢信之也但為小口口是故使眾人老小賢不肖男女下及奴婢者大小集議不可得以為偽其以公報私也中會有不安而言之者或有不肖或有輕口不能匿或有老人壽在旦暮不復忌諱或有婦女小兒行言不能隱匿共為姦也故其事會泄故無姦悉得真也得真則天地心調真人知之耶唯唯本帝王所以連連相承負之過責治常失天心流災不絕絕者復起皇天不安多害氣疾病不得久大樂須臾樂者復惡其大咎正在此猾人共背天地而欺帝王人乃以天地為命以帝王為父母愚人及背其命而共欺其父母故天地共憎之帝王惡之其法惡死有餘罪當流後生也是故災不絕害日多人壽日少萬物常亂也正咎在是也豈真人已大覺重知之耶唯唯子可謂已知之矣是故吾知皇天深疾惡是故吾

使是文復重口口為其平遠失其一事一事可起失之于前得之于後此事尤重大大惡之也吾知其口口以示勸真人以付歸上道德之君得而行之與神無異也乃且太平上皇正氣立自來也吾之文不敢負天地不負上德君不負後生下古之人不負萬物行之立效善哉善哉願聞一人上書何故亂天二人何故亂地然此者各從其家并策相應者相感動此自然法子知之耶唯唯行子已知之矣天下之事各從其類也願問天師今應此文言為之寧能盡實核天下悉信耶然天下悉信矣願聞其意然且語真人大要說今是主者長吏亦畏民泄其事而生之六考問長得其信也民亦畏縣官得其短亦復信也縣官長吏居民亦畏行於他方上書者得其短亦信也行上書者亦畏縣長吏居民得其短也亦信也更相畏非敢有妄語者也亦非有可隱也是故使三處上書縣官與居民與行者悉旦三相應不失錄分也神哉為道如此願聞到也所集議人當於何期乎善哉子

之言悉記於太平來善之宅下何必於此然其有奇方殊文可使投於太平來善宅中因集議善焉於其下而四方共上事也為一人議中悔而止或為旁人所止上書便在方道中止意以其所匿事罪之如此書者天下已得矣帝王已長游矣善哉善哉今天師文積備多當盡何投之其文獨為上出者止於上悉為天下事出者悉出之子知之耶唯唯行去夫上德之君天自使有聖心且緣是自有善意自有善令儀此為天法不失絲髮也事亦不可勝記常苦文行去唯唯

右天告六真人使重知三道行文書訣

太平經卷之八十六

太平經卷之八十八八十九

作來善宅法第一百二十九

傳九

六方真人再拜願有所問一疑行言之今天師前所勸愚生拘校上古中古下古之要文及究竟賢明之善辭口中訣事也今四境之界外內或去帝王萬萬里或有善書其文少不足乃遠持往到京師或有奇文殊方妙術大儒穴處之士義不遠萬里往詣帝王街賣道德或有黎庶幼弱老小田家嬰兒婦女曾心各有所懷善字訣事各有一兩十數少少又不足使人遠齋持往詣京師或有四境夷狄隱人胡貊之屬其善人深知秘道者雖知中國有大明道德之君不能遠故齋其奇文善策殊方往也今天師言乃都合古今河洛神書善文之屬及賢明口中訣事以為潤極之經乃後天地開闢以來災悉可除也帝王長遊樂垂拱無憂也言一事不足備輒有餘災故當都合之今不知當以何來致此奇方殊策善字迺悉得之善哉善哉諸真人思念劇也天神已下告諸真人矣上皇之氣來祐